



Minister di Asuntonan Economico y Energia, ing. Mike de Meza:

Ta prematuro pa mi bisa cu confirma, pero mi persona si ta sumamente positivo



ORANJESTAD (AAN): 'E ta muestra sumamente positivo,' asina Minister di Asuntonan Economico y Energia ing. Mike de Meza a duna di conoce na final di e bishita cu el a haci e siman aki na e barco di investigacion Polar Duke. E laboratorio marino staciona den e awanan pa-noord di nos isla colectando informacion cu ta forma parti di e 3D Sismico. A base di esey, Repsol hunto cu British Gas y Total ta bay dicidi di ta bay na e siguiente fase cu lo ta perforacionnan di prueba den buskedanan di mineralnan den nos subsuelo teritorial. 'Awo nan ta mas of menos na mita caminda di unda nan mester yega,' Minister de Meza a splica. Polar Duke tin como tarea for di Repsol, pa cubri un area di 3.200 kilometer cuadra. Ta spera cu pa fin di september, ta finalisa. E titular di Energia a realisa un bishita di inspeccion na e barco, dia el a yega Aruba. A bay wak e operacionnan mas di cerca y na final lo bolbe pasa pa wak con cosnan ta canando den e fase aki. Gabinete Mike Eman ta trahando riba e proyecto aki for di momento cu a asumi mando na aña 2009. A haci tur e analisis necesario y invita companianan internacional, di cual Repsol di Spaña, a resulta esun mas atractivo. Asina a firma contract y a cuminsa cu un estudio 2D aña pasa cual resultado prometededor a conduci na haci un 3D Sismico riba un area mas specifico pa-noord di Aruba, mas of menos 9 kilometer leu di costa. E area cu ta explorando ta cu-

bri na e parti pazuid di Aruba, un 12 miya, e parti pariba ta entre 30 y 40 miya y e parti pabou ta mescos. Panort ta sobrepasa 250 km of 160 miya. Pa e 3D bay den un area mas concentra cu ta pa-noord di Aruba. Exploracion 3D ta hopi mas detaya. 'Bo ta papia di mas di 30 Terabyte pa dia. Bo mester captur'e prome y esey ta tuma mas of menos tres luna. E informacion mester worde procesa y esey ta via sistema sumamente avansa y ta dura facilmente entre cinco pa ocho luna,' Minister ing. De Meza a splica. Despues ta bay na e fase di interpretacion caminda geologo y otro experto y ingeniero ta sinta pa evalua, compara cu datonan historico y analisa pa tuma un decision. Minister ing. Mike de Meza a indica cu e bishita haci algun dia atras tabatin cune indicacionnan sumamente positivo.



E tres companianan mester dicidi si ta bay na e di tres fase cu ta esun di "proefboring." Minister ing. De Meza a splica cu e gasto involvi ta sumamente grandi. 'Un so por costa bo 100 miyon Dollar. E 2D ta entre 15 pa 20 miyon. E 3D ta entre 35 pa 40 miyon.' E placa cu ta worde hinca ta cuantioso y pesey semper ta haci evaluacion. E deal ta cu nan ta haci exploracion y si haya algo, bo tin un Product Sharing Agreement. Tur esaki ta sin conta ainda cu mester set up e fase di explotacion. 'Esey ta hopi mas, ta papia di biyones. Resto, cu ta e gran parti, ta di pais Aruba. Awo ta depende di con e profundidad ta caminda e reserva ta, ki tipo di mineral e ta, si ta azeta, etc. Tur esey ta hinca den e contracto y saca e som kico e companianan ta haya pa recupera e inversion,' e titular

di Asuntonan Economico y Energia a indica. Minister ing. De Meza a añadi su pensamiento y sentimentonan pa cu e posibel resultado di tur e estudionan aki. El a bisa: 'Mi

ta hopi optimista. E ta prematuro pa mi bisa cu confirmacion. Te awor e proceso ta cu nos ta canando y scrutinando cada fase. E datonan cu nos tin ta muestra un probabilidad. E ta sigur te na momento cu bo bay haci un proefboring; cu bo hay'e, pero ta muestra sumamente positivo. E Minister ta keda cu e hecho cu ta hinca tanto placa aden y e hecho cu te hasta grandinan ta uni, ta duna indicacion cu e ta muestra bon. 'Seguridad bo ta haya na fin di dia ora mas e proceso bay di performacion; e ora ey bo sa echt. Pero mi persona si ta sumamente positivo. Dios ta grandi, mi ta sigur na fin di dia e noticia lo ta hopi positivo pa Aruba.'